

չըջաններում և հրդեհում հայ գիւղերը, զանազան անպատասխանատու խմբակներ վերջ չեն տալիս իրենց զրգոյիչ ընթացքին և կամենում են պառակտում առաջ բերել երկրի մէջ, առանց հաշի առնելու, որ ամէն մի խլրտում առաջ կը բերէ անիշխանութիւն ու պարենաւորման սուր տագնապ և կը դրկէ ժողովուրդը ապրուստի միջոցներէց :

Քաղաքացիներ՝, Հայաստանը կարիք ունի հանգստի և համերաշխութեան . ո՛չ մի յուզում, ո՛չ մի խլրտում—ամէն ոք պէտք է գտնուի իր գործի և պաշտօնի գլխին : Զինւած պարլամենտից ստացած արտակարգ լիազօրութիւններով՝ կառավարութիւնը դիմում է ձեր քաղաքացիական գիտակցութեան և հրաւիրում ամենքիդ, հայ ժողովրդի գոյութեան այս ճգնաժամային վայրկեանին, համախմբուել կառավարութեան շուրջը, որի նշանաբանն է՝ Հայաստանի անկախութեան և ազատութեան պաշտպանութիւնն ու ներքին դեմակրատիկ կարգերի ամրապնդումը : Այս նպատակներն իրագործելու համար կառավարութիւնը չի խնայի և ո՛չ մի ճիգ, և նա կը յաղթէ ձեզ հետ և ձեզ համար :

Նախարարապետ և արտաքին գործերի նախարար՝ Հ. Օհանջանեան
Զօրական և ներքին գործերի նախարար՝ Ռ. Տէր-Մինասեան
Գիւղատնտեսութեան և աշխատանքի նախարար՝ Ս. Վրացեան
Ֆինանսների և արդարադատութեան նախարար՝ Ա. Գիւլիսանյանեան
Հաղորդակցութեան նախարար՝ Ա. Զամալեան
Հանրային կրթութեան և արւեստի նախարար՝ Գ. Ղազարեան
Խնամատարութեան և վերաշինութեան նախարար՝ Ս. Արարատեան

Միևնոյն ժամանակ յայտարարուեց բոլոր դաշնակցականների ընդհանուր զօրաչարժ : Ամէն կողմ ուղարկուեցին դաշնակցական յայտնի գործիչներ լայն լիազօրութիւններով : Ամէն տեղ սկսուեցին կազմուել կամաւորական գնդեր : Ալեքսանդրապոլը վերադարձուելու համար կազմուեց առանձին մի զօրամաս, որի գլուխ դրուեց ժողովրդական խմբապետ Սեպուհը : Արագութեամբ շարժման մէջ դրուեցին և կանոնաւոր զօրամասերը : Հիմնուեց արտակարգ դատարան, և, առհասարակ, երկիրը դրուեց արտակարգ վիճակի մէջ : Կառավարութիւնը յայտնաբերեց բացառիկ եռանդ և կարճ ժամանակում ստեղծեց հասարակական բարձր տրամադրութիւն :

Հասարակական կարծիքը ամբողջապէս վաւերացնում էր կառավարական քայլերը : Քաղաքական կուսակցութիւնները, պետական և տեղակարական հիմնարկութիւնները, հանրային կազմակերպութիւններն ու անհատ քաղաքացիները իրենց գնում էին կառավարութեան տրամադրութեան տակ : Նմանը չեղած ոգևորութիւն ու եռուղեւ էր սկսուել մայրաքաղաքում ու գաւառներում : Հայ սոցիալ-դեմոկրատների Հայաստանի բանւորներին, գիւղացիներին և քաղաքացիներին ուղղած մայիս 14-ի կոչը հետևեալ ձևով էր արտայայտում այն օրերի հասարակական տրամադրութիւնը :

«Պատահեց այն, ինչ ամենից քիչ սպասելի էր և ամենից շատ դատապարտելի :

Բազուի քաղաքական կոմեդիան վերածուեց Ալեքսանդրապոլի ողբերգութեան . իսլամական խարուսիկ կոմունիզմից նւաճուեց ստրկամտօրէն հայկական բերդը, հայութեան որրանը :